



Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, , den 24/11/2023

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Finanzen & Justiz weiderzeleeden.

Online Glécksspiller a Wette sinn en legitimen a milliardeschwéiere Maart vun dem Lëtzebuerg kéint zousätzlech Steuerrecetten generéieren. Verschidde Länner, wéi Malta, hunn eng attraktiv Gesetzgebung, fir d'Glécksspill-Industrie op hiren Territoire unzezéien. Och an der Belsch zum Beispill ass d'Glécksspill iwwert präzis Gesetzer streng encadréiert.

Lëtzebuerg fiert aktuell een anere Wee a garantéiert der *Lotterie Nationale* ee Monopol fir all Zort vu Glécksspiller a Wette hei am Land. Dëse Monopol funktionéiert net: Firme kommen iwwert d'europäesch Unioun trotzdeem hei eran. Queesch duerch d'Land gesäit een a Caféen illegal Spillmaschinne stoen, wou vill Suen iwwert auslännesch Serveren (Malta, Brasilien, etc.) verspillt ginn. An der Äntwert op eis parlamentaresch Fro n°2927 hat de Justizministère d'Präsenz vun 2.000 illegalen Internetbornen bestätegt. Et goufen an der Vergangenheet keng nennenswäert Efforten ënnerholl, fir dës illegal Aktivitéiten ze stoppen oder dës Bornen iergendwéi juristesche z'encadréieren. Dëst soll elo geännert ginn, no engem entspreche Passage am Koalitiounsaccord vun der neier Regierung.

An deem Zesammenhang wéilt ech de Ministeren dës Froe stellen:

1. D'Glécksspillgesetz vun 1977 gesäit am Artikel 4, Punkt 3, fir Sportswetten eng Taxe vu maximal 25.000 Frang (600€) souwéi ee Maximum vu 15% Bäitrag op "*les sommes engagées ainsi que ceux sur les prix à distribuer*" vir. Den entspreche groussherzogleche Reglement vum 7te September 1987 bezitt sech awer hei –iertemlecherweis (?) – nëmme op d'*sommes entrantes*. D'Dispositioun ëm dëse Gesetzesartikel a säin zougehéiregen RGD-Artikel suergen deemno fir Verwirrung, well net gewosst ass, ob sech dëse Prélèvement op 15% vun de Wettasätz plus 15% vum Spillgewënn bezitt oder reng op d'Differenz tëscht Wettasaz an dem Spillgewënn.
 - Bezitt de Steiersaz aus dem Artikel 4 Punkt 3 vum Glécksspillgesetz sech op déi 15% vun de Wettasätz plus 15% vum Spillgewënn **oder** op d'Differenz tëscht dem Wettasaz an dem Spillgewënn (also dem Benefice)?
 - Kann d'Regierung erklären, firwat den "Taux de Prélèvement" vu 15% nach ëmmer deen héchsten an der ganzer EU ass?
 - Wäert déi nei Regierung den Taux de Prélèvement op de Gewënn (Benefice) fixéieren?
 - Wäert d'Regierung den aktuellen Taux vu 15% reduzéieren?



www.piraten.lu

2. D'Gesetz vum 17ten August 1963 iwwert de Steueraccord tëscht Lëtzebuerg an der Belsch vum 30ten August 1962 *ayant pour but d'éviter la double imposition en matière de taxes perçues à l'occasion des concours de pronostics sur les matches de football* erméiglecht et enger belscher Sociéit, déi Wettaktivitéiten an der Belsch ubitt, ouni weider Autorisatioun um lëtzebuergesche Marché deelzehuelen an de lëtzebuergesche Steiertaux vu 15% ze ëmgoen, well déi belsch Steier fir dës Entreprisë gëllt.
 - Kënnen d'Ministere bestätegen oder widerleeën, dass eng a Wettspiller autoriséiert Firma an der Belsch hei am Land nom belsche Steiersaz besteiert gëtt? Falls jo, bezitt sech dës Steiersaz eleng op Wette bei Fussballmatcher oder och op aner Sportarten a Gléckspiller?
3. Wéi vill Steuerrecettë goufen an deene leschten dräi Joren duerch d'Gléckspillgesetz ageholl, opgelëscht no Joer an no Dispositioun aus dem Gléckspillgesetz vun 1977?
4. D'Regierung huet am Koalitiounsaccord festgehalten, dass d'Gléckspillgesetz op de Leescht soll geholl ginn, mee dass Gléckspiller weiderhin nëmmen a Casinoen dierfen ugebuede ginn, obwuel ee groussen Deel vu Gléckspiller um Internet ugebuede gëtt. Firwat ass d'Regierung net de Wee gaangen vun enger Liberaliséierung vum Gléckspill?

Mat déiwem Respekt,



GOERGEN Marc
Deputéierten

